



Buna luna suenter la festività reussida han tant organisaturs sco referent: Marsha Lampert, Rico Valär, Fanny Cavalon, Claudia Götschi, Valentin Vincenz e Janet Nigg (da san.).

FOTO C.CADRUVI

Festina reussida per ils 80 onns lingua naziunala

Referat, chanzuns e capuns a Buchs

■ (anr/vi) A Buchs en il café da linguas s'inscuntran mintg'emna personas che vulan discurre ed exercitar autras linguas. Activs èn er intgins Rumantschs. La mesemna han els envidà ad ina saira da far endament al giubileum dad 80 onns lingua naziunala. Adina il mardi daventa il «Seecafé» a Buchs in café da linguas ed ins po prender plaz ad ina maisa nua ch'i vegn discurren franzos u ad ina maisa spagnola. En tut han ins la chaschun da discurren diesch linguas (guarda fanestra). A mintga maisa sesa ina moderatura u in moderatur che propona in tema u in gieù. Era Valentin Vincenz ha avant intgins onns cumenzà cun la maisa rumantscha. «Las emprimas trais giadas eran nus mo duas personas», raquinta el. «Uss vegnan adina var diesch personas che discurren vallader, puter u sursilvan.» Fitg bain represchentà saja er il dialect da Domat.

Commemoraziun cun referat

Vincenz ha prendi l'iniziativa per festivar en il café l'80avel anniversari dal rumantsch sco lingua naziunala. Embelli la saira da il Chor maschadà Rezia Bassa sut la batgetta dad Eugen Casanova. In'entira squadra da dunnas ha procurà che la raspada da festa survegna capuns delizius. Beneventà han ins er il president da la Lia

Rumantscha Johannes Flury. En il center da la saira è stà il referat da Rico Valär, professer per litteratura e cultura rumantscha a Turitg. Cun 91,6 pertschient da las vuschs decida il suveran svizzer il favrer 1938 ch'il rumantsch daventia lingua naziunala. Ina uschè auta procentuala hajan cuntanschì mo duas autras votaziuns federalas, ha ditg Valär. El ha skizzà ils mecanissem ch'han manà a quest segn da simpatia ed el ha cumenzà cun la carta geografica che l'avat da Bonstetten aveva disegnat en il temp medieval da la confederaziun. En il center da la carta sa chatta il Rigi – in culm. L'identità svizra è gia baud vegnida cumbinada cun culms e cun la vita alpina, betg cun las citads. Il turissem cun sias cartulinas postalas ha anc enfirmi quest maletg d'ina Svizra sco pajais da chatschadurs e muntagnards.

Muntognas e Rumantschs

L'entschatta dal 20avel tschientaner mettan tendenzas irredentisticas en dumonda la lingua rumantscha. Ella saja be in dialect talian, hai num. Er ils naziunalists tudestgs spetgan che la lingua rumantscha gaja a frusta, uschia ch'il tudestg possa sa derasar en ses territorii. Encunter questas tendenzas sa furma in moviment che Valär ha analisà minuziusamain en ses cudesch «Weder

Italiener noch Deutsche!» En la propaganda per la votaziun davart la quarta lingua celebreschan ins ils Rumantschs sco pievel muntagnard, pia sco pievel collià stretg cun l'identità svizra. Questa propaganda, ma era la resistenza encunter las tendenzas naziunalisticas ed irredentisticas da l'exteriur mainan al resultat da votaziun impresunant per il rumantsch.

Hebreic, chines, russ e rumantsch

En sazez è il café da linguas in'uniun. Ma ins dastga er ir en il café da linguas a Buchs senza ch'ins entria en l'uniun. «Commember u giast, nus ans legrain da mintga visita», stat scrit sin la pagina d'internet «www.sprachencafe-buchs.ch» Damai ch'i vegn purschi tantas linguas sa brattan ins giu mintga duas emnas. Ina giada vegn discurren tudestg, franzos, spagnol u russ. E l'autra emna vegn discurren englais, talian rumantsch, chines e hebreic. Las proximas maisas rumantschas han lieu ils 20 da november, ils 4 da december ed ils 18 da december.